

Ihumanea Pāngarau He Aha i Pēnā ai te Otinga? MĀ TE KAI AKO

Kia Mōhio te Ākonga ki:

- te whiriwhiri i tētahi rautaki arorau
- te tuhi whārite taurangi

Kupu Matua:

hoahoa rerenga, paheko tau, whārite, kōaro, otinga


Whāinga Paetae:

Taumata 4, Te Tau me te Taurangi

8. Ka whakaatu pānga rārangi, mā te whārite whai taurangi (ka whakaoti hoki i te whārite), mā te ture, mā te kauwhata.

Hei Mahi:

He raupapatanga paheko tau e whakaaturia ana ki te hoahoa rerenga nei.




1. Whakaarohia tētahi tau tīmatanga ka whai ai i te hoahoa rerenga. He aha te otinga?

Ahako te tau tīmatanga, ko te 5 te otinga.

2. Kia 4 pea ngā tau tīmatanga rerekē. He aha te otinga?


Ahako te tau tīmatanga, ko te 5 te otinga.

3. Kua tuhia he tohu ki te taha matau o te hoahoa rerenga. Āta tirohia ngā tohu, ka whakamārama mai ai.



Ko tā ngā tohu, he whakaatu i ngā paheko tau, arā, ngā tāpiritanga, ngā whakareatanga, ngā tangohanga me ngā whakawehenga. Ko te Δ hei tohu i te tau tīmatanga, ko ngā ira e tohu ana i ngā mea i tāpiria atu ki taua tau tīmatanga.

4. Hurihia te hoahoa rerenga hei whārite. Whakamāramatia te whārite.



Ko te a hei tohu i te tau tīmatanga. Kei roto i ngā pororapa te hua o ia paheko. E whakaaturia ana te paheko kei runga i ngā pere.

5. He aha i 5 ai te otinga, ahakoa te tau tīmatanga?


Hui katoa, ko te 5 i tāpiria atu ki te tau tīmatanga.

Ko te 3 i te hīkoitanga tuatahi, ko te 4 i tāpiria i te hīkoitanga tuawhā, engari i whakawehea taua 4 ki te 2, nō reira, ko te 2 tērā i tāpiria atu.

Hui katoa te 3 me te 2, ko te 5 i tāpiria atu ki te tau tīmatanga


I te hīkoitanga tuatoru, i whakareatia ki te 2, engari i muri mai ka whakawehea ki te 2. Nō reira kāore he aha o aua paheko e rua (he kōaro tētahi i tētahi)

He mea tango atu te tau tīmatanga i te hīkoi whakamutunga, nō reira ko te 5 anake e toe mai ana:



6. Whakaarohia tētahi atu raupapatanga paheko, he ōrite te otinga ahakoa te tau tīmatanga. Tuhia tō raupapatanga paheko hei hoahoa rerenga, ka whakamārama mai ai.

Hei tauira:



I te hīkoitanga tuarua, i whakareatia te tau tīmatanga ki te 4, engari i te hīkoitanga tuawhā me te tuaono i whakawehea ki te 2. Nō reira kāore he hua o ēnei paheko e toru.

I te hīkoitanga tuatoru i tāpiria te 2, engari i whakawehea tēnei ki te 2 i te hīkoitanga i muri mai. Ko te tāpiri i te 1 te hua.

I te hīkoitanga tuarima i tāpiria te 7. Hui katoa ko te 8 tērā i tāpiria.

I te hīkoitanga tuaono i whakawehea taua 8 ki te 2, nō reira, ko te 4 tērā i tāpiria ki te tau tīmatanga.

I te hīkoitanga whakamutunga i tangohia te tau tīmatanga, nō reira ko te 4 anake i toe mai.